

Izjava: Visoki predstavnik poziva na pregled srebreničke dokumentacije

Visoki predstavnik Paddy Ashdown danas se sastao sa premijerom Republike Srpske u ostavci, Draganom Mikerevićem.

Visoki predstavnik je izrazio zabrinutost što Vlada Republike Srpske do danas nije oformila grupu koja treba analizirati dokumentaciju koju je dostavila Komisija za događaje u i oko Srebrenice, te identificirala sve zvaničnike, sa naglaskom na one koji su još uvijek uposleni u vlastima RS, a čija imena se pojavljuju u povjerljivim aneksima. Visoki predstavnik je podsjetio premijera Mikerevića da "očekuje da se posao obavi, i izvještaj dostavi državnom tužitelju i OHR-u do kraja februara."

RS Vlada se javno obavezala izvesti pred lice pravde odgovorne za ratne zločine. Analiza dokumentacije je jedna od mjera planiranih da se iz RS institucija smijene – naročito iz bezbjednosnih struktura RS – oni koji snose individualnu odgovornost za nesuradnju RS sa Haškim tribunalom i izvedu pred lice pravde oni koji su direktno odgovorni za te zločine.

Visoki predstavnik je ponovno potvrdio da Republika Srpska i Bosna i Hercegovina moraju osigurati provođenje mjera koje je naveo na konferenciji za medije održanoj 16. decembra prošle godine. Obaveza je svih država u regionu da u potpunosti surađuju sa Haškim tribunalom.

Visoki predstavnik je također informirao premijera Mikerevića o osobnom obećanju koje mu je dao premijer Srbije Vojislav Koštunica jučer u Beogradu, kada je rekao da će učiniti sve što je moguće kako bi pomogao Republici Srpskoj da Haškom

tribunalu isporuči osobe osumnjičene za ratne zločine.